

**KANTONALNA  
PRIVREDNA  
KOMORA TUZLA**

**BROJ 9 i 12/18,  
septembar/decembar  
2018. godine**



# **KOMORSKI INFORMATOR**

**SRETNU I USPJEŠNU 2019. GODINU**

**ŽELI VAM**

**KANTONALNA PRIVREDNA  
KOMORA TUZLA**



**AKTIVNOSTI KOMORSKIH  
TJELA I UDRUŽENJA**



**LED DISPLAY NA ZGRADI  
KOMORE**



**AKTIVNOSTI U KOMORI**



**SAJAMSKE AKTIVNOSTI**



## Komorski informator

# Uvod

Poštovani čitaoci!



*I 2018. godina dođe do kraja. Još jedna u nizu onih koje su u najavi bile teške, teže od prethodnih. Kao što je sve do sada prošlo i kao što uvijek sve prođe, prošle su i sve teškoće, sve dobre stvari koje je sobom nosila godina na izmaku.*

*One pozitivne treba pamtiti, prepričavati ih a iz onih koje nisu bile takve, pokušati izvući pouku, potruditi se ne ponoviti ih, ne raditi iste greške.*

*Otprilike se tako, uz želje za zdravljem, veseljem, dobrom srećom, koncipiraju čestitke za narednu godinu za koju će se opet reći da će biti teška, teža od prethodne, lakša od naredne.*

*Pa neka i od „redakcije“ Komorskog informatora krene čestitka svima kojima ovo komorsko glasilo dođe do ruku.*

*Neka vam 2019. godina donese puno zdravlja, lične i porodične sreće, puno prostora za uživanje u životu, za odmor, za druženje sa najmilijima, za druženje sa onima koji će vas obasjati i napuniti pozitivnim duhom, a onda, neka uz sve to dođe i puno poslovnih uspjeha, novih kontakata, novih poznanstava i poslovnih partnera, značajnijih poslovnih iskoraka...*

*Ili je možda uspjeh nešto drugo, možda je bolje reći, neka sve ostane kako jeste, samo da ne ide na gore od ovoga...*

*Sretna vam Nova godina!!!*



Dino Kalesić  
gl. i odg. urednik

## Komorski informator

# Sadržaj

**KANTONALNA  
PRIVREDNA  
KOMORA TUZLA**

**KOMORSKI INFORMATOR  
BROJ 9 i 12/18,**  
septembar/decembar  
2018. godine

**IZDAVAČKI SAVJET:**

1. Nedret Kikanović, član
2. Mirsad Kukić, član
3. Bajazit Jašarević, član
4. Suad Selimović, član
5. Nurudin Žunić

**REDAKCIJSKI KOLEGIJ:**

1. Nedret Kikanović, član
2. Almir Mešić, član
3. Nurudin Žunić, član
4. Suad Selimović, član

**IZDAVAČ:**

Kantonalna privredna  
komora Tuzla

**GL. I ODGOVORNI UREDNIK:**

Dino Kalesić

**TEHNIČKA PRIPREMA,  
REPRO I ŠTAMPA:**

GRIN d.o.o. Gračanica

**ZA ŠTAMPARIJU:**

Adnan Imerović, direktor

**TIRAŽ:**

500 primjeraka.

**ADRESA:**

Trg slobode bb  
e-mail: [kpktz.ba@bih.net.ba](mailto:kpktz.ba@bih.net.ba)  
<http://www.kpktz.ba>

	Aktivnosti komorskih tijela i udruženja	4 i 5
	Led display na zgradi Komore - Nova usluga članicama i firmama u TK	6
	Aktivnosti u Komori	7
	Neophodnost nastavka normalne proizvodnje GiKIL-a	8 i 9
	Prolongiran početak rekonstrukcije tunela u Ormanici	10
	“Piemonte” Tuzla među nagrađenima	11
	Sajamske aktivnosti	12 i 13
	Privreda TK na sajmu privrede u Sarajevu	14
	“Challenge fond za inovativne poslovne ideje”	15
	Stabilni strateški partneri za sigurnije poslovanje lukavačke koksare	16
	Iz komorskog sistema	17 i 18
	Iz privrede TK...	19 i 20



Aktivnosti komorskih tijela i udruženja...

## Održane sjednice UO i Skupštine Komore

Izabrani organi Kantonalne privredne komore Tuzla



U nizu aktivnosti tijela i organa Kantonalne privredne komore Tuzla u prethodnom periodu, bilježe se i sjednice UO i Skupštine. U oktobru su donesene odluke o imenovanju Komisije za verifikaciju mandata u Skupštini Kantonalne privredne komore Tuzla, razmatrani su i uz određene korekcije i dopune, usvojeni izvještaj ove Komisije za verifikaciju mandata, Odluka o verifikaciji mandata predstavnika u Skupštini Kantonalne privredne komore Tuzla, Poslovnik o radu Skupštine, Izvještaj Komisije za izbor i imenovanje a donesene su i odluke o izboru organa Kantonalne privredne komore Tuzla: predsjednika i potpredsjednika Skupštine, članova Upravnog odbora, članova Nadzornog odbora i predsjednika Komore. UO i Skupština Komore u novom sazivu, potvrdili su izbor Nedreta Kikanovića za predsjednika Kantonalne privredne komore Tuzla.

## Sjednica Odbora Udruženja za trgovinu, ugostiteljstvo i turizam

Razmatrana aktuelna problematika i predložene aktivnosti za Plan i program rada u 2019.



Sjednica Odbora održana je i u Udruženju za trgovinu, ugostiteljstvo i turizam Kantonalne privredne komore Tuzla. Razmatrana je aktuelna problematika u oblasti trgovine, ugostiteljstva i turizma na području Tuzlanskog kantona i predložene aktivnosti za Plan i program rada u 2019. godini. Ponovo su na ovom skupu, kao i prethodnih nekoliko godina, apostrofirani nelegalan rad, rad na crno, siva ekonomija, nelojalna konkurencija, nezaposlenost, nedostatak školovanog kadra, teme o kojima se najviše i najduže raspravlja, pojave koje se najčešće analiziraju i za koje se već dugo neuspješno traži rješenje. Razgovarano je i o problemu sa turističkom taksom koja je suprotna Ustavu. Nakon iscrpne diskusije članovi Odbora Udruženja donijeli su zajednički zaključak da se u narednom periodu uspostavi tjesna saradnja Odbora Udruženja sa resornim ministarstvom, lokalnim zajednicama, inspekcijama, tržišnim inspekcijama i drugim institucijama, u cilju hitnog rješavanja pomenutih problema. Kada su u pitanju smjernice za rad i djelovanje Udruženja u narednoj godini, naglašena je potreba organizovanja B2B susreta. Potrebno je ciljne odrediti centre za djelovanje u regionu, planirati održavanje što većeg broja susreta sa privrednicima iz regiona, prvenstveno se misli na Hrvatsku i Srbiju a sve kako bi se omogućilo privrednicima prostor za razmjenu iskustava, proširenje tržišta, nove poslovne poteze.

Istaknuto je da se pokuša zajedničkim snagama, privrednici i Komora, organizovati doček i prijem delegacija kao i odlaske naših privrednika u centre interesovanja. Ovdje su kao pozitivna, istaknuta dosadašnja iskustva brojnih privrednika nakon B2B susreta sa Privrednom komorom Kraljevo a s druge strane i njih negativnih iskustava iz brojnih razgovora i susreta sa velikim brojem turskih privrednih delegacija koje su ocjenjene bezuspješnim. „**U Komori Tuzla je urađeno više neuspješnih susreta sa turskim delegacijama, treba se okrenuti regionu, bližim i ekonomski povoljnijim mogućnostima saradnje i poslovanja**“, zaključak je članova Odbora ovog komorskog Udruženja. Saradnja sa resornim udruženjem u PK FBiH i generalno sa kantonalnim privrednim komorama i PKFBiH, istaknuta je kao neophodna u narednom periodu a s ciljem bolje povezanosti i organizovanosti što automatski znači i lakše podnošenje inicijativa na Federalnom nivou a za ostvarivanje boljih uslova poslovanja. Nastupi na sajmovima i posjete značajnijim sajmovima na principu po kojem je Komora do sada organizovala predstavljanje svojih članica, pozitivno su ocjenjeni i apostrofirani kao značajna aktivnosti i u 2019. godini. „**Veoma značajni su nastupi na sajmovima u zemlji i regionu. Potrebno otvoriti nove destinacije kao što su Beograd, Novi Sad, Osijek, Sarajevo, Mostar, da se i tu pojavimo kao izlagači. Isto tako, poželjno bi bilo organizovati posjete značajnim i većim sajmovima u široj regiji**“, složni su članovi Odbora. I dalje treba raditi na jačanju odnosa i saradnje sa resornim ministarstvom TK, sa Turističkom zajednicom TK i opštinskim/gradskim turističkim organizacijama, pokušati poduzimati zajedničke aktivnosti, organizovati zajedničke nastupe na sajmovima, a zašto ne i organizovati sajam u Tuzli. Upućeni su i prijedlozi za organizovanje tematskih radionica u Komori od kojih se prva očekuje već u prvom kvartalu naredne godine. Neophodno je i narednom periodu raditi na povećanju broja članica Udruženja i poduzeti aktivnosti kako bi naplata članarine bila kvalitetnija i redovnija.



## Sjednica Odbora Udruženja za građevinarstvo i IGM

Razmatrana aktuelna problematika i predložene aktivnosti za Plan i program rada u 2019.



U okviru Udruženja za građevinarstvo i industriju građevinskog materijala Kantonalne privredne komore Tuzla, održana je sjednica Odbora Udruženja u proširenom sastavu. Dnevni red je obuhvatio Razmatranje aktuelne problematike u oblasti građevinarstva i IGM na području TK i Prijedloge aktivnosti za Plan i program rada Udruženja za 2019.godinu. Nakon diskusije članovi Udruženja su donijeli zaključke vezane za izmjene i dopune određenih zakonskih odredbi, pojmova, razgovaralo se o definisanju izvođačku cijenu 1m<sup>2</sup> stambene površine, o rentama, građevinskim zonama, posebno, o izuzetno dugom roku izdavanja određenih dokumenata što je apsolutno neprihvatljivo i potrebno u najkraćem roku riješiti. Istaknuto je kako je potrebno pokrenuti inicijativu sa izmjenama i dopunama zakona o javnim nabavkama, jer se prilikom

prijavljivanja na tender javljaju firme iz Republike Srpske koje dobiju posao iako se ne bave prodajom bandera, a firme koje se bave proizvodnjom bandera zbog cijene ne mogu dobiti tender. Također, potrebno je o cjelokupnom problemu koji opterećava oblast građevinarstva, rješenje potražiti u djelovanju sa resornim kantonalnim ministarstvom, te kroz organizovanje okruglog stola na koji bi se pozvali predstavnici Ministarstva prostornog uređenja i zaštite okolice, predstavnici Službe za prostorno uređenje i zaštitu okoline Grada Tuzla i općina Tuzlanskog kantona i privredne subjekte - članove Udruženja Kantonalne privredne komore Tuzla. usvojeni Plan i program rada za 2019. godinu podrazumijeva kvalitetniju komunikaciju sa građevinskim firmama i praćenje njihovog rada, aktivno učešće u izmjenama i dopunama Zakona o prostornom uređenju i građenju TK, poticaj razvoja građevinske industrije, razmatranje aktuelna problematika vezana za nastup građevinskih firmi na domaćem i ino tržištu. Također, potrebno je poduzeti aktivnosti na prevazilaženju problematike deficita kadrova u građevinarstvu. **“Neophodno je poduzeti aktivnosti na organizaciji posjeta, nastupa i prezentacija na specijalizovanim sajmovima građevinarstva i građevinske opreme u zemlji i inostranstvu prema iskazanom interesu članica. Imamo pozitivna iskustva sa sajmovima u Beogradu i Budvi i neophodno je učiniti maksimalne napore kako bi se i u 2019. godini obezbijedilo učešće na ovim značajnim sajamskim manifestacijama, a po prihvatljivim uslovima kao što je to bio slučaj u 2018. godini”**, zajednički je zaključak članova Odbora Udruženja za građevinarstvo i industriju građevinskog materijala Kantonalne privredne komore Tuzla.

## Sjednica Odbora Udruženja poljoprivrede i prehrambene industrije

Usvojen Plan i program rada u 2019.



Sastanak članova Odbora zabilježen je i u okviru Udruženja poljoprivrede i prehrambene industrije Kantonalne privredne komore Tuzla. Na ovom veoma značajnom skupu za privredu Tuzlanskog kantona, upriličeno je predstavljanje EU4Business - Program grant sredstava za poljoprivredu i poduzetništvo. Sekretar

ovog komorskog Udruženja Suad Selimović je upoznao učesnike sastanka sa početkom, partnerima, pristupom, predanostima kao i cilju EU4Business - Programa. Zajednički, jednoglasno, članovi Odbora su zaključili kako je potrebno da se svi članovi Udruženja dobro pripreme za učešće u ovakvom projektu i da se dobro organizuju. Razgovarali su poljoprivrednici Tuzlanskog kantona i o Inicijativi za uspostavu Centra za poljoprivredno poduzetništvo, u cilju podrške članovima Udruženja na izradi aplikacija za grant sredstva objavljena u Javnim pozivima. Zaključeno je da se u što kraćem roku takva inicijativa i podnese. Program rada Udruženja za 2019. godinu, jednoglasno je usvojen. Na kraju, zaključak je sa ovog skupa, da se 3 člana iz Udruženja poljoprivrede najave novom vodi koalicije prije postavke Vlade TK, kako bi se dao prijedlog da za poljoprivredu bude predstavnik neko iz poljoprivrede ko je upućen u situaciju na terenu.




Led display na zgradi Komore...

## NOVA USLUGA ČLANICAMA I FIRMAMA U TK



Poštovani, Led digitalno oglašavanje, u poređenju s tradicionalnim medijima oglašavanja, poput billboarda, čijeg se sadržaja jedva sjeti manji od 40 posto gledatelja, u zadnje vrijeme ima velike prednosti. Osim mogućnosti višestrukog reklamiranja jednog oglašivača na istom mediju, dokazano je da su pokretne reklamne poruke daleko više privlačnije nego statične reklame. Obavještavamo vas da je Kantonalna privredna komora Tuzla u prilici ponuditi vam oglašavanje na našem led displayu po povoljnim uslovima.



POSTANITE PARTNER KANTONALNE PRIVREDNE KOMORE  
TUZLA!!!  
OGLASITE SE NA NAŠEM LED DISPLAY PROSTORU!!!  
ISKORISTITI IZUZETNO POVOLJNE GODIŠNJE I  
ŠESTOMJESEČNE PONUDE!!!  
POSEBNE POGODNOSTI ZA FIRME ČLANICE KOMORE!!!  
Kantonalna privredna komora Tuzla  
Kontakt osoba: Dino Kalesić  
mob: 061/164-311  
tel: 035/369-562  
mail: dino@kpktz.ba  
POSJETITE NAS! DOĐITE DA SE DOGOVORIMO!!!



Aktivnosti u Komori...

## „Breanding i strategijski marketing“



Kantonalna privredna komora Tuzla je u saradnji sa programom EU ProLocal koji je zajednički program Evropske Unije i njemačke Vlade za podršku lokalnoj samoupravi i ekonomskom razvoju, a implementira ga njemački GIZ - Deutsche Gesellschaft für Internationale Zusammenarbeit (GIZ) GmbH, organizovala obuku za preduzeća pod nazivom „Breanding i strategijski marketing“.

Cilj seminara na kojem je predavač bio Miloš Šipragić magistar ekonomskih nauka iz Agencije za razvoj preduzeća Eda iz Banja Luke, bio je informisanje preduzeća o važnosti, principima i najvažnijim elementima strategijskog marketinga i brendinga u poslovanju preduzeća, sa primjerima i smjernicama za primjenu u poslovanju. Seminar je okupio upravo one kojim je i bio namijenjen, direktore, rukovodioce organizacionih jedinica nadležnih za marketing, zaposlene na poslovima marketinga, prodaje, istraživanja tržišta, dizajna, preduzetnicima i brojne druge polaznike koji su željeli da prošire znanja iz oblasti marketinga i brendinga.

## U 2018. godini 14 novih članica



KANTONALNA  
PRIVREDNA  
KOMORA TUZLA

Kada je u pitanju članstvo u Kantonalnoj privrednoj komori Tuzla, zadovoljstvo je istaći kako je u 2018. godini nastavljen trend povećanja broja članica. Velikom broju privrednih subjekata koje su potpisale članstvo u Komoru, pridružilo se njih još četrnaest. Riječ je o slijedećim firmama koje su se odmah po uclanjenju u Komoru, aktivno uključile u rad granskih udruženja te izjavile spremnost za sudjelovanje na sajamskim manifestacijama u okviru zajedničke sajamske postavke pod nazivom „Privreda TK“ koje će i u narednom periodu za svoje članice organizovati

Kantonalna privredna komora Tuzla a zahvaljujući izuzetno kvalitetnim međukomorskim odnosima u zemlji i široj regiji te podršci Vlade Tuzlanskog kantona. To su PJ „Hotel Vidikovac“ Divič – Zvornik, „Izazov“ doo Kalesija, „Net Green“ doo Lukavac, „Star-Centar“ doo Živinice, „Inproz-institut“ doo Tuzla, „Inproz group“ doo Tuzla, „!Orbiter“ doo Tuzla, „ZH-Zola“ doo Živinice, Rusmin Milavić Tuzla - Hercegovački čajevi, „Alpha Smart Energy“ doo Tuzla, „Imus Team“ doo Banovići, „Agrofruit“ Šatorovići, „Multi Lab“ doo Tuzla, „S- Pharm apoteka“ Tuzla.

Izdavanje ATA karneta...

## Obračunski period 1.7. do 14.12.2018. 2018. godine



U 2018. godini je nastavljeno izdavanje ATA karneta u Uredu Vanjskotrgovinske komore Bosne i Hercegovine u Tuzli pri Kantonalnoj privrednoj komori Tuzla. Podizanje dokumenata vrši se na mjestu gdje je zahtjev i podnesen. „Kada su u pitanju izdati ATA karneti i dodatni listovi u ovoj godini, dakl od 01.07. do 14.12.2018., pristiglo je ukupno 216 zahtjeva. Od toga su bila 105 zahtjeva za izdavanje ATA karneta i 111 zahtjeva za izdavanje dodatnih listova za ATA karnet. Od 105 zahtjeva za izdavanje ATA karneta, 54 zahtjeva su podnijela fizička lica iz sljedećih opština: Kalesija, Zavidovići, Tuzla, Lukavac, Doboj Jug, Bijeljina, Živinice, Šekovići, Srebrenik, Lopare, Milići, Ugljevik, Zvornik i Sapna, a 51 zahtjev su podnijele firme iz Bijeljine, Gračanice, Lukavca, Živinica, Srebrenika, Kalesije, Tuzle, Usora, Kladnja, Tešnja, Zvornika, Sapne, Banovića, Milića i Ugljevika. Ukupno 92 fizička lica su podnijeli zahtjev za izdavanje dodatnih listova, a 19 zahtjeva stiglo je iz privrednih društava“, izjavila je Edina Kanić Kurtić stručni saradnik za pravne, administrativne i opće poslove - Uredu za pružanje informacija o ATA sistemu i izdavanje ATA karneta Vanjskotrgovinske komore u Tuzli. Sve dodatne informacije, kao i potrebne upute o ATA sistemu i obrasce, zainteresirani mogu pronaći na web stranici Vanjskotrgovinske komore BiH [www.komorabih.ba](http://www.komorabih.ba) ili direktno – na osnovu dole navedenih kontakt informacija kao i u Uredu Vanjskotrgovinske komore Bosne i Hercegovine u Tuzli pri Kantonalnoj privrednoj komori Tuzla - Trg slobode bb – 75000 Tuzla - Tel/fax. +387/35/396-556 i Fax:+387/35/369-552, email: [atatz@komorabih.ba](mailto:atatz@komorabih.ba) - kontakt osoba: Edina Kanić Kurtić.



Sjednica Odbora Udruženja za hemiju i nemetale...

## Neophodnost nastavka normalne proizvodnje GiKiL-a

„Vlada Tuzlanskog kantona nije za gašenje GIKIL-a, nego za njegov rad u zakonski predviđenim okvirima“



Udruženje za hemiju i nemetale Kantonalne privredne komore Tuzla, je održalo redovnu sjednicu Odbora Udruženja. Sastanak upravo u GiKiL-u je iniciralo komorsko Udruženje: **„Udruženje za hemiju i nemetale Kantonalne privredne komore Tuzla dogovaralo je i organizovalo današnji sastanak i već u pripremi sastanka zauzelo jedinstven stav o neophodnosti nastavka normalne proizvodnje GIKIL-a te, da smo došli, da na ovom sastanku iskazemo usaglašeni odnosno jedinstven, čak, imperativan stav u tom smislu“**, istakao je Nurudin Žunić sekretar ovog komorskog Udruženja. Članovi Odbora Udruženja su iskazali nedvojbenu podršku uposlenicima GIKIL-a u nastojanjima za povoljnim ishodom odnosno dobijanjem okolinske dozvole ali i zahtjeva vladajućim na svim nivoima, o potrebi kontinuiranog prilagođavanja zakonodavstva baziranog na usvojenim strategijama u cilju unapređenja i privrede i okolinskih aspekata, odnosno, održivog razvoja. Predstavnicima GiKiL-a su govorili o postignućima firme, posebno, o postupku podnošenja zahtjeva za dobijanje okolinske dozvole. Usvojen je i Program rada za 2019. godinu, dogovoreno je da se jedna od tema narednog sastanka Odbora, odnosi na strateška opredjeljenja zaštite okoliša. Donesen je zaključak da se podrška GIKIL-u izrazi putem saopštenja za javnost.

### • Saopćenje za javnost

Global Ispat Koksna Industrija d.o.o. Lukavac (GIKIL), uz ispunjenje osnovnih zakonskih predušlova vezanih za zaštitu okoliša, mora nastaviti raditi, jedinstven je zaključak Udruženja hemije i nemetala Kantonalne privredne komore Tuzla. Sjednici Odbora ovog Udruženja koja je održana 25.10.2018. godine u prostorijama GIKIL-a, prisustvovali su predstavnici kompanija i institucija koji čine okosnicu privrede i razvoja Tuzlanskog kantona. Podsjećajući na značajan napredak kojeg je kompanija GIKIL već postigla u posljednja tri mjeseca pomoću zacrtanih ciljeva jasno definisanih strategijom od 47 ključnih projekata za siguran i ekološki prihvatljiv rad GIKIL-a, predsjednik Udruženja Zuhdija Aganović kazao je da je otvorena podrška svih prisutnih jasna poruka i federalnim institucijama. **„Ljudi koji sjede ovdje danas nisu samo veliki privrednici, nego i stručnjaci koji apsolutno poznaju GIKIL,**

**postrojenja, mogućnosti i zakonske procedure koje su pune nedostataka. GIKIL hoće i može da radi, imamo bazni inženjering, znamo kako da poboljšamo procese, radnici, uprava i nadzorni odbor su odlučni u tome, ali nam treba pomoć i onih koji o svemu tome odlučuju. Odgovornost mora postojati na svim stranama, stoga ćemo i prema federalnim ministarstvima ići sa zaključkom da rad GIKIL-a nema alternativu, jer bi prestanak rada GIKIL-a izazvao nesagledivu krizu i posljedice na ukupnu ekonomiju Kantona i zemlje kojoj treba razvoj, a ne gašenje“**, kazao je Aganović. Otvorenu podršku nastavku rada GIKIL-a ovom prilikom iskazali su predstavnici kompanija Siseccam Soda Lukavac, Fabrika Cementa Lukavac, Solana Tuzla, KEMIS-BH Lukavac, Variplast Gračanica, Institut za zaštitu, ekologiju i obrazovanje Tuzla, Kantonalna privredna komora Tuzla, predstavnici Ministarstva privrede Tuzlanskog kantona, te druge članice Udruženja.



### • Kantonalna Vlada i Sindikat saglasni da GIKIL treba nastaviti da radi

S ciljem iznalaska načina za prevazilaženje krize u Global Ispat Koksnoj Industriji Lukavac (GIKIL) delegacija Vlade Tuzlanskog kantona, predvođena premijerom Jakubom Suljkanovićem upriličila je sastanak sa predstavnicima sindikalne organizacije GIKIL-a. Kako je premijer Suljkanović istaknuo, Kantonalna vlada već nekoliko dana bezuspješno pokušava da dogovori sastanak sa predstavnicima relevantnih federalnih institucija, Vlade, ministarstava i inspekcija.

**„Ponovno ćemo pokušati ishodovati održavanje takvog sastanka na kojem bi se, zajedno sa predstavnicima federalnog nivoa vlasti trebalo razgovarati o prolongiranju roka za izvršenje mjere obustave rada u GIKIL-u, čime se direktno ugrožavaju radna mjesta, ali i poslovanje brojnih drugih kompanija“**, rekao je premijer Suljkanović i dodao da je Vlada Tuzlanskog kantona otvorena za razgovore sa svim relevantnim subjektima, što je više puta do sada već pokazala.

**„Federalna vlada i Federalna uprava za inspeksijske poslove (FUZIP) imaju ključ za rješenje ovog problema. Mi danas molimo Vladu Tuzlanskog kantona da pokuša utjecati na Vladu FBiH i FUZIP kako bi se izdejstvovala odgoda izvršenja mjere prekida rada u GIKIL-u“**, rekao je predsjednik sindikata GIKIL-a Mirsad Imamović.

S tim u vezi Sindikat je pripremio i urgenciju u kojoj se navodi da je neophodno da se upravljačke strukture Kompanije (Uprava i Nadzorni odbor) obavežu pismenim putem i neophodnim odlukama da će u roku od 6 mjeseci planski otkloniti i sanirati sve nedostatke utvrđene u nalogima FUZIP-a, za što će obezbijediti i neophodnu novčanu investiciju. Na osnovu ove pismene garancije Kompanije, u Urgenciji od Federalne Vlade traži da kod FUZIP-a izdejstvuje odgađanje izvršenja Rješenja o obustavi rada GIKIL-a.

Zaključci koje u svojoj Urgenciji Sindikat navodi su konkretni i izvodivi, što pokazuje na izlaz i rješenje ovog problema, a oni su i u suglasju sa stavovima Kantonalne vlade, koji su više puta do sada ponovljeni, rečeno je tokom sastanka.

**„Ponavljam, Vlada Tuzlanskog kantona nije za gašenje GIKIL-a, nego za njegov rad u zakonski predviđenim okvirima. Gašenje ove fabrike, osim gubitka oko 1000 radnih mjesta, dovelo bi u pitanje poslovanje Željeznica Federacije BiH, ali i drugih, oko 500 poslovnih subjekata koji su vezani uz poslovanje GIKIL-a“** rekao je premijer Suljkanović.

Također, predstavnici Sindikata su se osvrnuli i na nedavni protest ispred sjedišta federalnih institucija u Sarajevu.

**„Žalostno je da nas u Sarajevu niko nije primio na razgovor. Sindikat će se, kao davljenik, hvatati za svaku slamku i opciju, te se koristiti svim sredstvima da očuva fabriku i radna mjesta“** zaključio je predstavnik sindikata Mirnes Mujkić.

Uz premijera Suljkanovića i predstavnike sindikata Imamovića i Mujkića, sastanku su prisustvovali i ministrica pravosuđa i uprave Ivana Kulić, ministar finansija Miralem Nuhanović i pomoćnik ministra privrede Rijad Bašić, te Adnan Tufekčić i Hajrudin Hodžić, u ime Sindikalne organizacije GIKIL-a.



### Rješavanje problema onečišćenja rijeke Spreče...

## Tvrtka iz Gruda pravi za GIKIL filtere



Global Ispat Koksna Industrija iz Lukavca (GIKIL) angažirala je poduzeće TSP Tehnofilter, tvrtku iz Gruda specijaliziranu za proizvodnju sustava za otprašivanje prostora i filtraciju, kako bi riješila problem onečišćenja rijeke Spreče. – Filter kojeg radimo za Lukavac u jednom objektu će potpuno sanirati zagađenje. Tvrtka GIKIL se upozнала sa našim radom, znaju kako smo za jedno zeničko poduzeće isporučili i instalirali 11 filtera koji su riješili onečišćenje u toj tvrtki i zato su odlučili dalje raditi s nama – navode iz Tvornice specijalnih proizvoda Grude. Prva aktivnosti u GIKIL-u je otprašivanje Koksare nakon koje će slijediti sanacija ostalih objekata u tvrtki. TSP Tehnofilter radi po vlastitoj tehnologiji, razvijenoj i patentiranoj s njemačkim partnerima, a zadovoljene su sve europske norme i standardi. Kada je u pitanju filter koji će biti instaliran u GIKIL-u, on je visok praktički kao zgrada te tvrtke od 25 metara. – Radi se ozbiljan pothvat kojim će oni moći očistiti i održavati pogon, a onda idu daljnje investicije da se kompletan problem riješi – ističu iz TSP Tehnofilter Grude.

Fena



Rekonstrukcija tunela na putu Tuzla – Orašje...

## Prolongiran početak rekonstrukcije tunela u Ormanici

Sastanak delegacija Vlade TK, predstavnika poslodavaca, JP Ceste FBiH, kompanije „Jata“



Radovi na rekonstrukciji tunela Ormanica na magistralnom putu M1.8 Tuzla – Orašje privremeno su obustavljeni i početak rekonstrukcije ovog tunela bit će prolongiran do daljnjeg, dogovoreno je da sastanku delegacija Vlade Tuzlanskog kantona, predstavnika poslodavaca, JP Ceste FBiH, koja upravlja magistralnim putevima i koja je investitor rekonstrukcije Tunela, te kompanije „Jata“ koja je izabrana za izvođača radova na rekonstrukciji Tunela. Također dogovoreno je da se u narednih 10-15 dana utvrde alternative trenutno predloženom načinu rekonstrukcije, a koje bi bile prihvatljive, kako za poslodavce i građane Tuzlanskog kantona, tako i za same investitore.

„Mi se radujemo poslu koji se treba i mora uraditi, te poslu kojeg je dobila kompanija sa našeg kantona, ali JP Ceste FBiH nije osigurala preduslove za blokadu ovog putnog pravca. Trenutno predloženi alternativni putni pravci će umnogome otežati, pa čak i onemogućiti rad i poslovanje brojnih poslovnih subjekata“, rekao je predstavnik kompanije Bingo Eldin Tabučić, ističući podršku projektu rekonstrukcije, ali na način na koji će privreda Tuzlanskog kantona ovu rekonstrukciju što manje osjetiti na svom poslovanju.

„Nakon što smo proveli pripreme radove za rekonstrukciju, prezentirane su nam indirektno štete koje bi prouzročovao potpuni zastoj saobraćaja kroz tunel Ormanica. Danas smo dogovorili da radove na rekonstrukciji i zbog predstojeće zimske sezone odgodimo do marta iduće godine. Također, dogovorili smo se da ćemo obraditi dodatnih 4-5 varijanti ovog projekta i da ćemo u narednom periodu prezentirati ta nova alternativna rješenja, te nadam se zajedno iznaći ono najpovoljnije rješenje za sve relevantne subjekte“, rekao je Izvršni direktor JP „Ceste FBiH“ Dedo Pjanić, dodajući da će Ceste FBiH sagledati i prezentiranu opciju izgradnje „dodatne cijevi“ na ovom putnom pravcu, te dati određene globalne okvire, ali da to zbog niza drugih zahtijeva koje bi taj projekat povukao, nije najbolja alternativa.

„Nema niti jednog razumnog čovjeka na Tuzlanskom kantonu koji nije za realizaciju ovog projekta, ali činjenica je da investitor nije sagledao ovaj projekat sa više aspekata, jer bi u ovom vremenskom okviru i na ovako predložen način rekonstrukcije, ona zaista izazvala ogromne štete. Izvoz je dominantna priča Tuzlanskog kantona i ovaj putni pravac je „žila kucavica“ od koje zavisi privreda Tuzlanskog kantona. Predloženi alternativni putni pravci znatno bi utjecali na cijenu koštanja transportnih usluga, što bi u konačnici sve morali snositi poslodavci, s jedne strane, da ne govorimo o složenosti uslova saobraćaja na tim alternativnim putevima, posebno u uslovima zimskog održavanja puteva“, rekao je predsjednik Grupacije poslodavaca Tuzlanskog kantona i direktor kompanije „Herceg“ Ramiz Karić.

„O važnosti ovog putnog pravca govori podatak da je privreda Tuzlanskog kantona upravo kroz ovaj tunel, prema graničnom prijelazu Orašje, u proteklih 9 mjeseci izvezla roba i usluga u vrijednosti 850 miliona KM, a u našem kantonu registrovano je oko 47% transportnih sredstava teretnog saobraćaja u Federaciji BiH. Sve ovo, uz niz drugih podataka govori u prilog da je zatvaranje tunela Ormanica u ovom momentu i na trenutno predloženi način nemoguća misija za privredu Tuzlanskog kantona, i mislim da bi to dovelo do nesagledivih posljedica. Samo kod jednog od prijevoznika, imamo podatak, da bi korištenje ponuđenih alternativnih putnih pravaca izazvalo štetu od oko 180.000 KM“ riječi su predsjednika Kantonalne privredne komore TK Nedreta Kikanovića.

Današnji sastanak drugi je u nizu, te Vlada na ovaj način nastoji preduprijeti ovaj problem.

„Optimista sam i očekujem da nam struka sa federalnog nivoa, za desetak dana ponudi prihvatljiva alternativna rješenja i pravce, kako bi smo izašli iz ovog problema na projektu rekonstrukcije tunela Ormanica“ zaključio je ministar trgovine, turizma i saobraćaja Mirsad Gluhić.



Pouzdanost 2018...

## “Piemonte” Tuzla među nagrađenima

POUZDANOST 2018: Najbolji iz bh privrede nagrađeni za iznadprosječne poslovne rezultate



“Pouzdanost u modernom poslovanju ima veliki značaj jer to podrazumijeva profesionalnost, stručnost, kvalitet i visoke ljudske i profesionalne vrijednosti“, istaknula je danas glavna i odgovorna urednica Poslovnih novina, Alena Ahmetspahić-Fočo, na otvaranju konferencije za dodjelu certifikata bonitetno pouzdanim kompanijama i poslovno umrežavanje “Pouzdanost 2018“. Organizatori vodeća bh. bonitetna agencija LRC BIS i Poslovne novine uz suorganizatora BBI VIP Business Club i specijalnog partnera Express Courier – UPS, uručili su za više od 80 privrednih subjekata iz BiH sa bonitetnom ocjenom 4 i 5 certifikate i Zvijezde bonitetne pouzdanosti. Ovom prilikom, naglašeno je da je proglašenje bonitetno pouzdanih kompanija zasnovano isključivo na rezultatima analize pokazatelja poslovanja koji su uokvireni u međunarodno priznate standarde i kriterije. “Od 32.292 bh. kompanije, njih 4.511 (14 posto) ispunilo je kriterije bonitetno pouzdanih. To je jedan posto više nego prethodne godine, a kontinuitet bonitetne pouzdanosti u posljednje tri finansijske godine imalo je 1.720 kompanija“, kazala je Ahmetspahić-Fočo.

“Kao neko ko radi sa mnogim uspješnim bh. kompanijama, mogu reći da je stanje bh. ekonomije mnogo bolje nego što se to prikazuje u javnosti. Imamo mnogo pouzdanih kompanija koje su garancija pozitivne biznis klime i sa njima trebamo graditi jaku bh. ekonomiju“, istaknuo je direktor BBI banke, Amer Bukvić.

“Naš recept pouzdanosti su zadovoljni zaposlenici. Ako imate jedan zadovoljan kolektiv onda se možete nadati motivisanim i produktivnim radnicima koji isporučuju najbolju uslugu klijentima“, naveo je direktor Express Courier BiH, Mirza Bavčić.

Direktor kompanije Hifa Oil, Izudin Ahmetlić, kazao je da privreda BiH ide u dobrom pravcu, ali dosta sporo i da se treba raditi na ubravanju procesa.

“Upoređujući period danas sa onim prije deset ili petnaest godina, mogu reći da su uslovi poslovanja u BiH mnogo bolji. Mislim da je jako važno da razvijamo firme koje se mogu boriti na tržištu i da ohrabrujemo privrednike da počnu izlaziti iz okvira BiH ne samo sa proizvodima, nego i sa kreiranjem kompanija jer je to najbolji način da zaštitimo domaće tržište“, naveo je Ahmetlić.

Među nagrađenima je i firma “Piemonte” Tuzla: “Velika čast i zadovoljstvo nam je biti jedna od najpouzdanijih kompanija u BiH. Zahvaljujemo se svim svojim uposlenicima, sa kojima smo zajednički ostvarili sve ciljeve i koji su ponajviše zaslužni za ovo priznanje. Također veliko HVALA i svim našim poslovnim partnerima“, saopćeno je iz menadžmenta firme “Piemonte” Tuzla.

U programu konferencije posebno su se istaknula predavanja Samira Cerića, uspješnog bh. poduzetnika sa adresom u Londonu te predsjednika Košarkaškog saveza BiH, Mirze Teletovića. Cerić koji trenutno aktivno radi na dolasku Formule E u naš glavni grad, govorio je o mogućnosti kreiranja tehnološkog centra u Sarajevu i Bosni i Hercegovini, dok je Teletović govorio o vlastitim biznisima koje je pokrenuo nakon prestanka aktivnog igranja košarke. U zabavnom dijelu konferencije, učesnici su se sa Mirzom Teletovićem takmičili u šutiranju slobodnih bacanja, a najuspješnijem je simbolično pripala nagrada “Zvijezda preciznosti“. Spisak i rezultati bonitetno pouzdanih kompanija ove godine će prvi put biti objavljeni u specijalnoj publikaciji koju će izdati Poslovne novine krajem godine.



D.K.



Sajamske aktivnosti...

## Privreda TK na 40. sajmu građevinarstva u Budvi

Kantonalna privredna komora Tuzla je zahvaljujući susretljivosti menadžmenta jadranskog sajma Budva, uspjela obezbijediti prostor za izlaganje na 40. sajmu građevinarstva u Budvi. Zadovoljstvo se nije skrivalo niti u Komori niti među firmama članicama Komore koje su nastupile i predstavile se na zajedničkoj postavci a u okviru jubilarnog sajma i u jubilarnoj godini, jer Jadranski sajam je slavi 50. godina postojanja. Bila je to još jedna izuzetno kvalitetno organizovana i posjećena međunarodna poslovna manifestacija. Ovaj sajam je jedan od najznačajnijih privrednih događaja u grani građevinarstva na širem području, što opravdava i jubilarnih 40. godina postojanja. Poslovni efekt koje pruža sajam, prepoznat je kao mogućnost izlagačima iz regiona i šire za ulazak na tržište Crne Gore i uspostavljanje privredne saradnje i direktan pristup ključnim kupcima. Sajamska platforma bila je prilika za komercijalizaciju proizvodnih dostignuća i inovativnih rješenja iz svih oblasti građevinske djelatnosti: visokogradnje, niskogradnje, izgradnje i održavanje objekata, okova i bravarije, sanitarne galanterije, inženjeringa i projektovanja, i kroz integrisani pristup nude cjelovita rješenja enterijera i eksterijera

za objekte različitih namjena. Prepoznalo se to i u Udruženju za građevinarstvo i industriju građevinskog materijala Kantonalne privredne komore Tuzla. Almir Mešić sekretar ovog Udruženja je okupio i organizovao nastup pet firmi članica Komore. U Budvi su se predstavili, ostvarili nove kontakte, dogovorili nove saradnje i poslovne poteze, firme "Tehograd company" Tuzla, "Wortmann metal" Tinja, "Tehna" Gračanica, "Annoa" Tuzla i "Vatrostalac" Tuzla. Sajam građevinarstva u programskom djelu je i ove godine okupio stručnu javnost, afirmisao održivi razvoj, podržao kvalitetne projekte i aktivnost od značaja za širu zajednicu. Budvanski sajam građevine je mjesto susreta struke i nauke, gdje se i na taj način učesnicima nudi mogućnost za snažnije povezivanje sa domaćim i ino-partnerima u poslovnom ambijentu. Međunarodni karakter Sajma potvrđuje kako prisustvo vodećih brendova, tako i organizovani nastupi regionalnih i državnih Privrednih komora, asocijacija i agencija. Firme članice Komore koje su izlagale u Budvi, izrazile su interesovanje za nastup na zajedničkom komorskom izložbenom prostoru i naredne godine.

## Privreda TK na 16. sajmu "Ekobis" u Bihaću



U Bihaću je održan 16. po redu međunarodni ekološki sajam "EKOBIS 2018". Ove godine, sajam je održan pod motom "Uzgojimo vlastitu hranu – pažljivo birajmo ishranu", s obzirom da je ovogodišnja tema sajma bila "Poljoprivredna proizvodnja i prehrambena industrija". Generalni pokrovitelj sajma bili su Vlada Unsko-sanskog kantona i Ministarstvo poljoprivrede, vodoprivrede i šumarstva Federacije BiH, dok je ovogodišnji regija-partner bila Virovitičko – podravska županija. EKOBIS je sajam izložbeno-prodajnog karaktera na kojem su se do sada predstavili izlagači iz: BiH, Hrvatske, Srbije, Crne Gore, Slovenije, Austrije, Njemačke, Češke, Slovačke, Italije, Francuske, Turske, Finske i Izraela. Sajam je službeno otvorio ministar poljoprivrede, vodoprivrede i šumarstva Federacije BiH mr. sci. Šemsudin Dedić. Na svečanom otvaranju sajma su sudjelovali brojni dužnosnici i gosti. U uvodnom obraćanju, potpredsjednik Privredne/Gospodarske komore F BiH doc. dr. sc. Marko Šantić istakao je kako ovaj sajam predstavlja odraz dosljednosti grada Bihaća da ostane na mapi aktivnosti usmjerenih na jačanje bh. ekonomije i kontinuirano povezivanje gospodarstvenika. Potpredsjednik Šantić je u ime Privredne/Gospodarske komore FBiH primio posebno priznanje za podršku 16. Međunarodnom sajmu ekologije EKOBIS 2018. U sklopu sajma je održana panel diskusija u organizaciji Privredne/Gospodarske komore F BiH pod nazivom „Gastro turizam - nove mogućnosti razvoja turizma u BiH“. Ove godine, na sajmištu u sportskoj dvorani "Luke", predstavilo se više od 230 izlagača iz nekoliko zemalja regije.

## Privreda TK na 25. sajmu "ZEPS" u Zenici



Zenica je bila domaćin jubilarnog 25. generalnog BH sajma "ZEPS" i 15. međunarodnog sajma metala "ZEPS Intermetal". Sajam je proglasio otvorenim Miralem Galijašević premijer Zeničko-dobojskog kantona. Na ovogodišnjem ZEPS-u učestvovalo je 480 izlagača iz 19 zemalja svijeta, na blizu 8.000 kvadratnih metara, dok je na ZEPS Intermetal sudjelovalo 20 izlagača. Vedad Šestić direktor Poslovnog sistema RMK Promet Zenica je naglasio kako se, u sklopu dogovorne platforme u BiH, nastoje osigurati svi uslovi da bh. firme uspiju na poslovnom planu. "Ali, nikako da naučimo iz naših grešaka te da objektivno pogledamo gdje smo pogriješili. Imamo cunami u odljevu naših mladih mozgova i mladih ruku u sve zemlje svijeta. O tome moramo javno govoriti i tome stati ukraj. Smatram da će ZEPS, kao najstariji bh. sajam, još dugo godina ostati brend Zenice i ZDK-a", rekao je direktor Šestić. I na ovoj sajamskoj manifestaciji bile su prisutne firme članice Komore na već prepoznatljivoj zajedničkoj postavci "Privreda TK".



## Privreda TK na 17. Međunarodnom Sajmu Privrede/Gospodarstva "Brčko 2018"



Bili su naši privrednici prisutni i na sajmu u Brčkom. "Privreda TK" u sastavu "FINra" Tuzla, Turistička agencija "BNS" Srebrenik, Rusmin Milavić Tuzla - Hercegovački čajevi, „Alpha Smart Energy“ doo Tuzla, "Fana" d.o.o. Srebrenik, "Piemonte" Tuzla, Ekskluzivni Dom za starija lica – Hotel Ahmedić i Wellness centar Lukavac predstavljena je na Međunarodnom sajmu privrede/gospodarstva. Bila je to izuzetna prilika da se na jednom mjestu sretnu veliki broj poslovnih ljudi, razmjene ideje,

iskustva i uspostave novi kontakti. Privredna komora Brčko distrikta BiH pod pokroviteljstvom Vlade Brčko distrikta BiH, Vanjskotrgovinske/Spoljnotrgovinske komore BiH, Antunović d.o.o., Bimal, d.d. Brčko i drugih privrednika Brčko distrikta BiH tradicionalno i ove godine organizovali su ovu značajnu sajamsku manifestaciju. 17. Međunarodni Sajam Privrede/Gospodarstva "Brčko 2018" održan je u novembru 2018. godine. Brčanski sajam predstavlja jedan od najznačajnijih privrednih/gospodarskih događaja na našim prostorima, što potvrđuje višegodišnji kontinuitet – tradicija održavanja Sajma, rezultati uspjeha, veliki broj izlagača kako domaćih tako i stranih. Sajam se i ove godine održavao na lokaciji bivšeg TC Tropik, u Ul. Petra Kočića bb Brčko distrikt BiH. Ova lokacija se pokazala kao izuzetno pogodna za održavanje ove privredne manifestacije, tako da je kontinuitet kvaliteta bio zadovoljen i ove godine.

## Privreda TK na 22. "Jesenjem sajmu" u Banjaluci



I ove godine je Kantonalna privredna komora Tuzla uzela učešće na „Jesenjem sajmu 2018“, organizuje "Banjalučki velesajam". Nastupile su najprestižnije kompanije iz oblasti koje obuhvata Jeseni sajam 2018. „Jesenji sajam 2018“ obuhvatao je 22. Međunarodni sajam poljoprivrede i prehrambene industrije – „AGROS“, 22. Međunarodni sajam lova, ribolova, ekologije i sporta – „LORIMES“ i 22. Međunarodni sajam turizma i ugostiteljstva. Kada je u pitanju sajamska industrija u Republici Srpskoj i BiH, „Banjalučki velesajam“ zauzima vodeće mjesto. U godini jubileja, izvršili su određene promjene u strukturi i načinu poslovanja (uredili izložbeni prostor, nabavili novu opremu), što se pozitivno odrazilo i na poslovne rezultate. Da je to tako, govori i činjenica da je broj izlagača u odnosu na prethodnu godinu povećan za 44%, a isto tako i broj posjetilaca povećan je za 31%.

## Privreda TK na 7. Zdravo domaće prirodno" u Zaječaru



Privredna komora Srbije - RPK Zaječar i Grad Zaječar su prema ocenama izlagača i posetioca uspešno organizovali trodnevni sajam na Trgu oslobođenja u Zaječaru. U okviru međunarodne, tradicionalne manifestacije „Zdravo domaće prirodno“ održani su i 4. Sajam finansiranja i 3. Sajam turizma. Cilj ove manifestacije jeste povećanje vidljivosti domaće privrede, njeno osnaživanje i bolje povezivanje proizvođača sa kupcima, ali i sa drugim proizvođačima. Na sajmu je učestvovalo preko 200 izlagača iz cijele Srbije, Bugarske, Bosne i Hercegovine, Hrvatske, Slovenije, a prema procjenama, bilo je oko 5000 posetilaca. Ponuda je bila raznovrsna: domaći specijaliteti iz raznih krajeva, sokovi, kvalitetna vina, rakija, med, čajevi, rukotvorine i drugo. Dejan Tošić, direktor PKS-RPK Zaječar je istakao da Sajam u Zaječaru okuplja brojne izlagače počev od najmanjih individualnih poljoprivrednih gazdinstava pa do najvećih kao što su Fabrika poljoprivrednih mašina „Agromehnika“ Boljevac i Fiatov program preduzeća Nikom iz Kragujevca. "Ovdje su i najveće banke i osiguravajuće kuće koje posluju u Srbiji, kao i turističke organizacije, počev od našeg regiona, pa do ostalih iz cijele Srbije i okruženja", istakao je direktor Tošić i na kraju se još jednom zahvalio Gradu Zaječaru, gradonačelniku Bošku Ničiću, Opštini Kladovo i TO Kladovo na ustupljenim štandovima, horu Osnovne škole „Desanka Maksimović“ i svim izlagačima na podršci svih ovih godina.

Članice Komore u okviru postavke Privreda TK:

Na sajmovima u Bihaću, Zenici, Zaječaru, Banjaluci a u okviru zajedničke izložbene postavke koju pod nazivom "Privreda TK" već tradicionalno organizuje Kantonalna privredna komora Tuzla, predstavile su se 28 firme članice Komore: "Fana" d.o.o. Srebrenik, "Piemonte" Tuzla, "Solana" d.d. Tuzla, "Porta Naturae" d.o.o. Srebrenik, Voćni rasadnik doo Srebrenik, Fabrika deterdženata „Dita“ Tuzla, „Borplastika Eko“ Tuzla, "Imel" doo Lukavac, "Corn Flips" Srebrenik, Turistička agencija "Golden tours" Tuzla, "Xella BH" d.o.o. Tuzla, "JKP Pannonica" doo Tuzla, "Eko život" Tuzla, "FINra" Tuzla, Turistička agencija "BNS" Srebrenik, Turistička zajednica TK, "TQM" doo Lukavac, "Seif" doo Kalesija, Tradicionalni obrt "Aronija Okanović" Tuzla, MI "Prima VIP" Orašje, "Mlin Nezić" Gradačac, Ekskluzivni Dom za starija lica – Hotel Ahmedić i Wellness centar Lukavac, "Lupo Group" PJ Tuzla, Hercegovački čajevi Tuzla, "Propak" Tuzla, "Tehnopak" Tuzla, Medicinski centar "Sporticus" Tuzla, "Annoa" Tuzla.

Pripremio: Dino Kalesić



Sajamske aktivnosti...

## Privreda TK na sajmu privrede u Sarajevu

Kantonalna privredna komora Tuzla besplatno obezbijedila izložbeni prostor za više od 30 izlagača iz TK na Sajmu privrede, poljoprivrede, zanatstva i roba široke potrošnje u Sarajevu



Izložbeni program sajma obuhvatao je poljoprivredne i proizvode prehrambene industrije (mlinsko-pekarska industrija, konditorska industrija, industrija za preradu i proizvodnju ulja, industrija za preradu voća i povrća, mljekarska industrija i dr.), zatim široke potrošnje (kozmetika, kućna hemija, odjeća i obuća), te stare zanate i kućnu radinost. Savjetnik federalnog ministra poljoprivrede, vodoprivrede i šumarstva Husnija Kudić istakao je važnost sajamskih manifestacija na kojima se predstavljaju postignuća domaćih proizvođača, posebno poljoprivrednih i proizvoda prehrambene industrije. **“Domaća proizvodnja ima svoje mjesto i perspektivu i naši proizvođači primjenjuju napredna tehnološka i inovativna rješenja. Ministarstvo poljoprivrede je u programu podrške predvidjelo, kako podršku za organizaciju sajamskih manifestacija, tako i za troškove samih izlagača po modelu ostalih vrsta podrške”**, kazao je Kudić. Osim izložbenog dijela, manifestacija je imala i bogat stručno edukativni program, a partneri sajma bili su Privredna komora Kantona Sarajeva, Organska kontrola d.o.o., „Esof“ d.o.o., te “Kristal Market”.

Sajam privrede, poljoprivrede, zanatstva i roba široke potrošnje, na kojem su izloženi proizvodi 227 izlagača, održan je u Sarajevu. Pod motom “Domaći proizvod u službi građana Bosne i Hercegovine” Centar Skenderija, odnosno Sarajevski sajam organizovao je 5. Sajam privrede, poljoprivrede i zanatstva i 42. Sajam roba široke potrošnje. **“Kantonalna privredna komora Tuzla i ove godine je uspjela obezbijediti izložbenu prostor. Zahvaljujući izvanrednim odnosima sa direkcijom sajma, obezbijedili smo izuzetno kvalitetan prostor, na izvanrednoj poziciji i bilježimo jedan od zapaženijih sajamskih nastupa. Zajedničku postavku pod nazivom ‘Privreda TK’ čini više od 30 izlagača, firmi članica Komore. Sajamski nastup za naše članice je besplatan. Ujedno, pozivamo one privredne subjekte koji se do sada nisu učlanili u Komoru, da to sada učine. Sajmom u Sarajevu završavamo sajamske aktivnosti za ovu godinu, a 2019. otvaramo nastupom na Sajmu turizma u Beogradu”** izjavio je za medije Dino Kalesic, rukovodilac sektora za promociju, regionalnu saradnju i odnose sa javnostima u Kantonalnoj privrednoj komori Tuzla. **“Svi prepoznaju ovu manifestaciju kao sajam velikih mogućnosti. Cilj je da pokažemo da ovdje mogu biti i velike kompanije i mali obrtnici koji na raznovrsnim štandovima predstavljaju svoje proizvode i usluge”**, kazao je direktor KJP Centar Skenderija Amer Kapo.



Sajam je proglasio otvorenim ministar privrede Kantona Sarajeva Muharem Šabić koji je naglasio da su svi vitalni ekonomski parametri privrede u KS u porastu. **“Izdvojio bih benefite za privredu u KS koje je donio Zakon o poticaju malih i srednjih preduzeća. U ovom mandatnom periodu u privredu KS uloženo je oko 120 miliona KM”**, kazao je Šabić. Pokrovitelji sajma su Ministarstvo vanjske trgovine i ekonomskih odnosa BiH, Federalno ministarstvo poljoprivrede, vodoprivrede i šumarstva i Ministarstvo privrede KS.

D.K.



Prezentovan 3. poziv za dodjelu grant sredstava...

## “Challenge fond za inovativne poslovne ideje”

„Inventivnost treba da podrazumijeva inovativnost na širem nivou, ne samo na nivou te kompanije”



Kantonalna privredna komora Tuzla i Sarajevska regionalna razvojna agencija SERDA organizovali su prezentaciju 3. poziva za dodjelu grant sredstava “Challenge fond za inovativne poslovne ideje”. Za aplikante su namijenjena sredstva u iznosu od oko 30 hiljada eura, i to za kompanije koje posluju duže od 2 godine i koje zapošljavaju do 250 zaposlenih, a kompanije koje su registrovane najmanje 6 mjeseci do 2 godine mogu aplicirati na grant sredstva do 10 hiljada eura. **“Svjesni smo da u ovom trenutku ne možemo očekivati neka velika tehnološka rješenja. Bili bismo sretni da i takve primjere imamo, ali u svakom slučaju ta inventivnost treba da podrazumijeva inovativnost na širem nivou, ne samo na nivou te kompanije”** navodi Sanela Dževlan, projekt menadžerica „Challege to change“. Kompanije moraju obezbijediti i vlastito učešće minimalno 50 % od ukupne vrijednosti projekta i taj projekat ne može trajati duže od 12 mjeseci. Ovim projektom podržavaju se inovativne ideje koje mogu dovesti do smanjenja nezaposlenosti, povećanja konkurentnosti i održivog društveno-ekonomskog razvoja u BiH. Cilj je svima onima koji imaju inovativne poslovne ideje, proizvode ili usluge, pomoći da povećaju broj zaposlenih i konkurentnost. Na ovaj se način direktno utiče na stvaranje održivog društveno-ekonomskog razvoja u BiH. Inače, Fond raspolaže sa oko tri miliona eura.

Inovativna rješenja mogu se odnositi kako na značajno poboljšanje postojećeg proizvoda, procesa ili usluga, tako i na njihov suštinski novitet. Bitno je naglasiti da za Challenge fond inovacija treba biti na višem nivou od internog nivoa privrednog subjekta. Činjenica je da konkurentnost privrednih subjekata upravo zavisi o inovativnosti. Nažalost, u našoj zemlji privredni subjekti se teško odlučuju za uvođenje inovacija, a glavni razlog je nedostatak finansijskih sredstava. Švedska agencija za međunarodni razvoj i saradnju - Sida je prepoznala taj problem i izdvojila 4.2 miliona eura za Challenge to change projekt koji će do 2020. godine implementirati Sarajevska regionalna razvojna agencija SERDA i Republička agencija za razvoj malih i srednjih preduzeća. Partner u projektu je i region Ostergotland, Istočna Švedska. Za potencijalne korisnike iz kategorije startup-a, koji su registrovani najmanje šest mjeseci, predviđen je maksimalni iznos granta do 10.000 eura, dok korisnici iz kategorije mikro, malih i srednjih preduzeća do 250 zaposlenih, koji obavljaju djelatnost duže od dvije godine, mogu računati na podršku u maksimalnom iznosu do 30.000 eura. Kako su naveli iz SERDA-e, sve pristigle prijave biće ocijenjene u skladu sa tri osnovna kriterijuma - inovativnost, izvodljivost i održivost poslovne ideje i društvena korist. Prijave na ovaj poziv moraju i mogle su biti podnesene isključivo u elektronskoj formi na [www.c2c.ba](http://www.c2c.ba) u skladu s uputstvima koja se nalaze u dokumentu Vodič/Smjernice za aplikante. Potencijalni aplikanti iz Bosne i Hercegovine imali su mogućnost da se detaljnije informišu o ovom pozivu u okviru info sesija koje su u proteklom periodu održane u Brčkom, Tuzli, Zenici, Posušju, Travniku, Banjaluci, Istočnom Sarajevu, Doboju, Prijedoru, Trebinju, Tešnju, Mostaru i Sarajevu. U okviru Challenge to change projekta, do sada su bila otvorena dva poziva za dobijanje bespovratnih sredstava Challenge fonda. U okviru prvog poziva potpisani su ugovori sa 28 korisnika granta za čiju realizaciju iz Challenge fonda je predviđeno 570 000,00 EUR. U okviru drugog poziva odabrano je 35 korisnika granta za čiju realizaciju iz Challenge fond je predviđeno oko 870 000,00 EUR.

Predstavljamo novu članicu Komore...

## Imus Team doo Banovići

Firma IMUS TEAM DOO BANOVIĆI koja se nalazi u UL. ALIJE IZETBEGOVIĆA BB, 75290 BANOVIĆI je jako mlada firma na poslovnoj sceni, tj. na tržištu BiH. Firma je osnovana u martu 2018.godine, a zvanično je počela sa radom krajem maja, kada je evidentirana kod Porezne uprave. Direktor je Nermin Idrizović, koji je ujedno i vlasnik firme. Osnovna djelatnost firme je proizvodnja i prodaja namještaja u maloprodaji i veleprodaji. Firma je orjentisana na domaće tržište, a svojim poslovnim aktivnostima želi se orjentisati i prema ino tržištu. Trenutne aktivnosti firme kroz djelatnost poslovanja jesu proizvodnja i prodaja roba - namještaja visokog kvaliteta iz linije pločastog i tapaciranog proizvodnog programa. Firma trenutno zapošljava 7 radnika, inače su svi zaposlenici kao i sam vlasnik firme starosne dobi do 35 godina. Trenutno firma pokriva lokalno tržište, pa djelimično i regiju TK. Dosadašnji kupci proizvoda iz ove firme, imali su samo riječi hvale. “Radimo i usluge montaže i isporuke u skladu sa dogovorima sa našim kupcima, proizvodnja je inače organizovana po narudžbi, gdje kupci mogu iznijeti svoje želje, a mi smo ti koji ispunjavamo očekivanja, za naše kupce stojimo na raspolaganju 24 sata, gdje nam se kupci sa svojim zahtjevima mogu javiti putem facebook stranice naše firme, web portala, pozivom na broj ili putem mail adrese. Asortiman roba i usluga iz naše proizvodnje mogu se pogledati u IZLOŽBENOM SALONU u Ul. Alije Izetbegovića bb, preko puta Borca u Banovićima”, izjavio je Nermin Idrizović direktor i vlasnik firme.



D.K.





„Xcoal Energy & Resources“ najveći izvoznik uglja iz SAD...

## Stabilni strateški partneri za sigurnije poslovanje lukavačke koksare

„Xcoal će nastaviti sa ispunjavanjem svih naših obaveza prema GIKIL-u, i da, sa nama koksara ima budućnost“



Da koksara u Lukavcu ima budućnost i da stanje u lukavačkoj koksari ima i svoju svijetlu stranu potvrđeno je na sastanku delegacija Vlade Tuzlanskog kantona i strateškog partnera, kompanije „Xcoal Energy & Resources“ najvećeg izvoznika uglja iz Sjedinjenih Američkih Država. Na sastanku, kojeg su inicirali predstavnici Vlade i KHK Lukavac, podcrtna je izuzetna saradnja koju GIKIL ima sa kompanijom Xcoal u posljednjih pet godina koliko je ova kompanija glavni dobavljač mješavine ugljeva za Koksaru. Također, izražena je spremnost za nastavak i unaprijeđenje postojeće saradnje.


„Xcoal će nastaviti sa ispunjavanjem svih naših obaveza prema GIKIL-u, i, da, sa nama koksara ima budućnost“, izjavio je na sastanku direktor kompanije „Xcoal Germany“ Ingo Elsner i dodao da GIKIL i Xcoal imaju dugoročni ugovor koji je na snazi do 2023. godine. „Ne vidimo niti jedan razlog da taj ugovor dovodimo u pitanje i stojimo na raspolaganju da zajedno rješavamo i trenutne, ali i sve eventualne buduće probleme, te smo zainteresirani i za nova ulaganja. Mi isporučujemo ugljalj i koks vodećim svjetskim željezarama i spremni smo i na eventualne investicije u nove baterije u Koksari“, zaključio je direktor Elsner, te akcentirao povjerenje koje ima u Vladu Tuzlanskog kantona i Koksno Hemijski Kombinat Lukavac, kao jednog od osnivača GIKIL-a.

Premijer Kantona Jakub Suljkanović je izrazio dobrodošlicu predstavnicima kompanije Xcoal na dolasku u Bosnu i Hercegovinu, te posebnu zahvalnost za iskazana opredjeljenja koja mnogo znače.

„Ovi stavovi i opredjeljenja strateških partnera mnogo znače i nama u Vladi Tuzlanskog kantona jer je i naše opredjeljenje da sačuvamo koksaru i da ona nastavi da radi. Ovakvi stavovi strateških partnera, koji obezbjeđuju sirovinu, ali i pomažu u pronalasku i pozicioniranju na tržištu kokska svakako su nam ohrabrenje i podrška da nastavimo sa našim aktivnostima da pomognemo GIKIL-u da prevaziđe trenutnu krizu“ rekao je premijer Suljkanović i još jednom naglasio značaj GIKIL-a i njegovog poslovanja. „Svojim poslovanjem GIKIL obezbjeđuje

oko 30% prihoda za Željeznice Federacije BiH, značajan dio prihoda za željeznice RS-a, treći je po veličini izvoznik iz Bosne i Hercegovine i sa oko 1% učestvuje u BDP-u BiH. Sve ovo pokazuje koliki je značaj poslovanja lukavačke koksare“, zaključio je premijer Suljkanović.

Osim direktora Elsnera današnjem sastanku su prisustvovali predsjednik grupacije „Xcoal Energy & Resources“ Jack Porco i službenik za kapitalna tržišta i marketing Ted O'Brian, dok su osim premijera Suljkanovića delegaciju Vlade TK činili ministar privrede Osman Puškar, savjetnici premijera Muzafer Brigić i Sead Hadžihrustić, direktor Koksno hemijskog kombinata Lukavac, jednog od suvlasnika GIKIL-a, Zuhdija Hasanhodžić, te član Nadzornog odbora GIKIL-a Ivana Bunoza.



Iz komorskog sistema...

## PK FBiH otvara prostor za saradnju sa slovačkom automobilskom industrijom



Predstavnici Privredne/Gospodarske komore FBiH, na poziv zamjenika šefa misije i konzula Republike Slovačke u Bosni i Hercegovini Attila Szepa, učestvovali su na petom „Slovakia Matchmaking Fair Bratislava 2018“, organizovanom pod pokroviteljstvom Slovačke agencije za investiranje i trgovinu (SARIO) 13. novembra 2018. godine u Bratislavi. Tom prilikom, dobrodošlicu predstavnicima P/G komore FBiH je poželio i prethodni konzul Republike Slovačke u BiH, a sadašnji voditelj poslovnog centra pri Ministarstvu inostranih i evropskih poslova Viktor Borecky. „Slovakia Matchmaking Fair“ je najveći

međunarodni business-to-business (B2B) događaj u Republici Slovačkoj sa fokusom na bilateralnim razgovorima. Učešće na „Slovakia Matchmaking Fair Bratislava 2018“ je iskorišteno da se tokom B2B sastanaka predstavi Privredna/Gospodarska komora FBiH sa svim svojim udruženjima, sa posebnim akcentom na automobilskoj industriji, koja je u posljednjem desetljeću doživjela veliki zalet i procvat u Republici Slovačkoj. Trenutno se u Slovačkoj proizvode automobili četiri velika brenda: Volkswagen, Kia, članica PSA grupacije i odnedavno Jaguar/Land Rover. Također, tokom boravka u Bratislavi, posjećena je Trgovačka i industrijska komora Slovačke, na čelu sa predsjednikom Peterom Mihokom i direktorom Ocjela za međunarodnu saradnju Jozefom Rajtarom. Tom prilikom se razgovaralo o aktivnostima u komorama, trenutnoj ekonomskoj situaciji u obje države, mogućnostima povezivanja kompanija iz BiH sa kompanijama iz Slovačke sa ciljem ostvarivanja značajnije poslovne saradnje, te o mogućnostima zajedničkog djelovanja obje komore prema evropskim fondovima. Kao rezultat toga, verificiran je Memorandum o saradnji ove dvije komore koji će, u narednom periodu biti i zvanično potpisan. Na osnovu već ranijih pregovora, upriličen je sastanak i sa državnim sekretarom Ministarstva ekonomije Republike Slovačke Vojtechom Ferenczom, na kojem su predstavljene aktivnosti P/G K BiH. Ferencz je iskazao želju da u budućnosti Bosnu i Hercegovinu vidi kao zemlju partnera u svim aktivnostima koje provodi Republika Slovačka.

## Šantić: Podstaci regionalno povezivanje u šumarstvu i drvnoj industriji

Predsjednik Privredne/Gospodarske komore FBiH Marko Šantić na konferenciji Adriatic Wood Days u Dubrovniku istaknuo je potrebu regionalnog povezivanja svih aktera na području drveta, šuma i bio mase.

Privredna komora FBiH bila je partner ove konferencije posvećene aktuelnim temama iz oblasti šumarstva i prerade drveta u jugoistočnoj Evropi, a osim predstavnika Komore, učestvovali su i predstavnici kompanija iz BiH. Uz stručnjake i kreatore politika iz regiona, više od 150 učesnika početkom ove sedmice bavilo se temama EU fondova i većeg korištenja sredstava iz Brisela, s naglaskom na sve veću ulogu biomase u energetici. Diskutovalo se o evropskim projektima, novitetima, te uspješnim regionalnim projektima, od kojih je najviše pažnje privukla priča bh. proizvođača Artisan iz Tešnja, koji uspijeva proizvesti skupi namještaj od masiva bukve i oraha i prodati ga na zahtjevnom svjetskom tržištu, postižući i do 20 puta veću dodanu vrijednost u odnosu na cijene ulazne sirovine. Naglašeno je da se neka od ograničenja nalaze u sferi obrazovanja i prijenosa znanja, ali i slabog interesa sektorskih kadrova i mladih stručnjaka za rad u drvno-prerađivačkoj industriji. Također, bilo je riječi o radnoj snazi, podizanju konkurentnosti na međunarodnom tržištu kao ključnom u narednom periodu, za šta su neophodna značajna ulaganja u marketing i otvaranja novih tržišta, a u tom dijelu svaka država mora aktivnije surađivati sa sektorom, istaknuli su brojni panelisti tokom rasprava. Pošto BiH nije članica EU, te kao takva nema adekvatan pristup svim raspoloživim fondovima na prostoru Evropske unije, Šantić je incirao da Privredna komora



BiH, Vlada FBiH i županijske vlade potpomognu svoje poduzetnike u sektoru drveta, poljoprivrede, turizma i energetike kroz lobiranje u Bruxellesu već postojećim kanalom Hrvatskog drvno-klastera. Konferencija 4. međunarodnog Adriatic Wood Days održana je u Dubrovniku od 2. do 4. decembra.



Iz komorskog sistema...

## Izabrani organi Privredne komore Kantona Sarajevo za mandatni period 2018-2022.

Na Konstituirajućoj sjednici Skupštine Privredne komore Kantona Sarajevo izvršena je verifikacija mandata predstavnika izabranih članova u Skupštini Komore za period 2018. – 2022. godine, saopćeno je iz Komore. Skupština u novom sazivu je tajnim glasanjem izabrala i ostale organe Upravni odbor, Nadzorni odbor i predsjednika Privredne komore Kantona Sarajevo Muamera Mahmutovića. Saopćeno je da su izabrani članovi u organe Komore prepoznali i istakli da je predsjednik Mahmutović, u svom dosadašnjem obnašanju ove funkcije, uspio pozicionirati Komoru kao važnu kariku u zastupanju interesa privrede i da je sa njim na čelu Komora, nakon dužeg perioda, uspjela ostvariti zavidne poslovne rezultate. Iz Komore ističu da su izbori provedeni u skladu sa „Zakonom o privrednim komorama u Federaciji BiH, Statutom Privredne komore Kantona Sarajevo, Odlukom Privredne komore Federacije BiH o raspisivanju izbora za organe i članove organa u privrednim komorama u Federaciji BiH, kao i drugim aktima Privredne komore Kantona Sarajevo.“

Privredna komora Kantona Sarajevo neprofitno je udruženje pravnih i fizičkih lica koja obavljaju privrednu djelatnost. Između ostalog, Komora zastupa interesa svojih članova pred državnim organima, posebno u pripremi privrednog zakonodavstva i ekonomske politike. Komorom od 2015. godine rukovodi Muamer Mahmutović. Tri godine prije izbora na čelo Komore bio je njen generalni sekretar. Izabran je na novi četverogodišnji mandat.



## Vuković: Digitalizacija povećava konkurentnost bh preduzeća



Konferencija "Digitalizacija bosanskohercegovačkog društva" održana je od 17. do 19. decembra u Sarajevu, s ciljem da se ukaže da ta oblast može da pomogne privredi i povećava konkurentnost preduzeća na domaćem tržištu i van Bosne i Hercegovine. Potpredsjednik Vanjskotrgovinske komore BiH Vjekoslav Vuković kaže da je cilj skupa bio da se ponude konkretna rješenja u tom procesu s ciljem dovođenja stranih investicija u svim segmentima društva i otvaranja novih radnih mjesta. Nosioci projekta su Vanjskotrgovinska komora BiH i firma "Global GPS BH", a izvršen je presjek stanja u BiH kada je riječ o digitalizaciji i informaciono-komunikacionoj tehnologiji, te inicirane aktivnosti koje će pokrenuti promjene. Vuković je na konferenciji za novinare u Banjoj Luci dodao da se digitalizacijom ostvaruje znatna finansijska ušteda u radu preduzeća, a poboljšava se sigurnost i pojednostavljuje pristup podacima. Direktor firme "Global GPS BH" Haris Hadžialić rekao je da projekat ima za cilj prepoznati prostor za investicije u informaciono-komunikacione tehnologije, te osnažiti tu oblast u BiH. Sekretar Udruženja za informaciono-komunikacione tehnologije pri Privrednoj komori RS Slobodan Dragičević kazao je u tom bh. entitetu djeluje 450 firmi iz tog sektora i da u njima leži velika snaga, kao i mogućnost povećanja BDP-a.

D.K.



Iz privrede TK...

## Solana d.d. Tuzla za devet mjeseci ostvarila najbolje poslovne rezultate od 1992.



Solana d.d. Tuzla, lider na tržištu soli u jugoistočnoj Evropi, ostvarila je u prvih devet mjeseci ove godine najbolje poslovne rezultate od 1992. godine. U ovom periodu zabilježeno je povećanje prodaje soli od 3.500 tona u odnosu na isti period lani, dok je izvoz porastao za 13%. Na pozitivno poslovanje najviše je uticalo povećanje prodaje na domaćem tržištu branda kuhinjske soli po kojem je Solana i poznata u pakovnju od 1 kg za čak 30% u odnosu na prethodnu godinu. Zabilježeno je i povećanje prodaje tabletirane soli od 24% gdje vidimo veliki potencijal za dalje proširenje na nova tržišta, navodi se u saopćenju za medije ove kompanije. "Kvalitet je konačno došao do izražaja. Naša so i njena vrhunska svojstva su najvažniji razlog za ovakve rezultate. Također, moramo istaći da je povećanje investicija u godinama koje su iza nas dalo doprinos kontinuiranoj

i kvalitetnoj proizvodnji. Veoma je važno da se rast prodaje bilježi kod svih gotovih proizvoda kako na domaćem tako i na ino tržištu. Dodatnim mjerama unaprijedili smo obim rada u službi i do 30%. Nova Uprava zajedno sa svim uposlenicima napravili su odličan posao. U periodu koji je pred nama u fokusu našeg poslovanja će biti dalje jačanje naše pozicije lidera na tržištu soli jugoistočne Evrope po definisanim standardima kvalitete. Također, ulaganjem u razvoj i modernizaciju uz zaštitu okoline želimo podići energetske efikasnost kompanije. Ipak, prioritet naše kompanije ostaje motivacija i obrazovanje naših zaposlenika, jer su oni temelj našeg razvoja i napretka", izjavio je Bakir Smailagić, direktor kompanije Solana d.d. Tuzla. Povećanje prodaje na domaćem tržištu pratio je i rast plasmana na inozemna tržišta za 13%. Uz povećanje prodaje a do sada poznatim tržištima Srbije, Makedonije, Kosova, Slovenije i Hrvatske, u zajedničkom nastupu sa bradnovima AS Holdinga ostvaren je plasman na nova tržišta kao što je Katar i druge zemlje Bliskog Istoka. S tim u vezi, u Solani vide priliku da zadrže i povećaju učešće na tržištima na kojima su trenutno zastupljeni, sa fokusom u narednom periodu na zemlje EU.

"Izvoz je naša velika šansa. Kvalitet koji postiže naša Solana vrlo je rijedak i to inozemna tržišta posebno prepoznaju. Tuzlanska so je jedna - jedina, i kao takva osim tradicionalnih tržišta u okruženju, s velikim očekivanjima idemo na osvajanje novih tržišta kao što su tržišta Dalekog i Bliskog Istoka, kao i tržišta evropskih zemalja", kazao je Smailagić. Solana d.d. Tuzla je jedna od najstarijih kompanija u Bosni i Hercegovini i naša najstarija prehrambena industrija.

## Nova poslovna jedinica Sarajevo-osiguranja otvorena u Tuzli

Nova poslovna jedinica Sarajevo-osiguranja otvorena je u Tuzli na adresi Maršala Tita 2A. Iz najveće domaće osiguravajuće kuće u Bosni i Hercegovini saopćeno je da će 17. decembra moderan centar otvoriti i u Zenici, prenosi NAP. Sarajevo-osiguranja je među vodećim osiguravajućim društvima u BiH, osnovano prije 70 godina. U 2018. godini su zabilježili 3,5 miliona KM veći rast poslovanja u odnosu na prošlu godinu, a projekcije govore da bi trend rasta trebao biti nastavljen i naredne godine. „Uskoro preuzimamo stanicu za tehnički pregled vozila u Kelesiji i Mostaru“, najavljuju iz Sarajevo-osiguranja, napominjući da je društvo u ovoj godini već preuzelo stanice u Brezi i Gornjem Vakufu. Društvo danas ima ukupno 14 modernih stanica za tehnički pregled vozila na području Bosne i Hercegovine.



## Aviokompanija Wizz Air želi nastaviti letove za Tuzlu do 2023. godine



Međunarodni aerodrom Tuzla počeo će pregovore sa kompanijom Wizz Air sve u cilju obnavljanja ugovora o saradnji do 2023. godine, piše portal EX-YU Aviation News. Postojeći četverogodišnji ugovor ističe u novembru 2019. godine, a direktor Wizz Aira Jozsef Varadi smatra kako će dogovor sa Tuzlanskim aerodromom biti postignut na obostranu korist. "Mislim da je Tuzli u interesu da Wizz Air nastavi sa svojim letovima. Nadam se da će Tuzlanski aerodrom prepoznati tu poslovnu priliku", rekao je Varadi. Iako je Wizz Air smanjio svoje letove tokom zime što je uzrokovalo par broja putnika od oko 17 posto, tuzlanski aerodrom iza sebe ima rekordnu godinu kad aje u pitanju broj putnika. Optimistične prognoze kažu da će tuzlanski aerodrom do 31. decembra dočekati 570.000 putnika i time zaključiti uspješnu 2018.



## Traži se kupac za bivšu Tvornicu konfekcije Borac Banovići



Nekadašnji objekti Tvornice konfekcije Borac Banovići ponudeni su na prodaju. Union banka d.d. Sarajevo, koja je vlasnik nekretnina Borca u gradskom području Banovića, uključujući i privrednu i poslovnu zgradu, te zemljište i ostale objekte, ponudila je imovinu bivše tvornice na javnu prodaju sistemom zatvorenih ponuda. Rok za dostavljanje ponuda bio je 30. novembar 2018. godine. Odlukom Općinskog suda u Tuzli iz juna ove godine u Tvornici konfekcije Borac Banovići zaključen je stečajni postupak, koji je otvoren prije dvije godine, tačnije 29. novembra 2016. Preduzeće, koje je nekad bilo gigant tekstilne industrije, tako je prestalo da postoji, a ostala je samo njegova imovina za koju se i dalje traži kupac.

## Kompleks Muška voda kod Kladnja i dalje propada



I pored nekoliko puta snižene cijene koja je na šestoj bezuspješnoj prodaji dostigla minimalnih milion i osam stotina hiljada maraka, nekada nadaleko poznati Kompleks Muška voda kod Kladnja nije pronašao kupca. Objavljena je i sedma javna prodaja, a iz Odbora povjerilaca i Vlade Tuzlanskog kantona kažu, da cijenu više neće snižavati. Svjedok lijepog prošlog vremena u ambijentu netaknute prirode danas ne služi ničemu. Na područje zaštićenog pejzaža Konjuh koji posjeduje i potencijal vazdušne banje i izvor Muške vode danas svrate samo rijetki. Sa početnih nešto više od tri miliona, cijena je danas snižena na nešto manje od dva miliona maraka. "Odbor povjerilaca na nedavno održanoj sjednici donio je odluku o sedmoj prodaji ovog Komplexa po istoj cijeni, a cijena je

milion i 870 hiljada maraka. A kako rekoste, hotel ne propada, hotel je samo konzerviran i sve stoji onako kako je bilo posljednjih dana kada je radio", ističe Šahudin Halilović, predsjednik Komisije stečajnog dužnika „Konjuh dd“ Kladanj. Kompleks je 2010. godine dat pod zakup kada su počeli i problemi. Preduzeće koje ga je održavalo danas je u stečaju, a kako navode u to vrijeme nije bilo interesa vlasti da se Kompleks sačuva, dok danas nadležno Ministarstvo ulaže napore, da bi ova priča otišla u pozitivnom smjeru. "Meni i Vladi Tuzlanskog kantona je bitno da taj Kompleks stavimo u funkciju. To je Kompleks od značaja za regiju. Kad god izađete iz Bosne i Hercegovine a kažete da ste iz tuzle ili Tuzlanskog kantona, odmah vas svi pitaju šta je sa Muškom vodom?", kaže Mirsad Gluhčić, ministar turizma TK-a. "Osim hotela u Kompleks spada još šest bungalova sa šest apartmana, fudbalski stadion, ski staza, fudbalsko igralište, odbojkaško igralište, kupalište na izuzetno čistoj rijeci", dodaje Halilović. Interes kupaca za sedmu prodaju postoji, a imajući u vidu da je riječ o nekada nadaleko poznatom turističkom brendu, iz preduzeća koje upravlja ovim Kompleksom se nadaju da će dočekati bolja vremena.

## U Živinicama otvorena Fabrika za preradu ribe: Zaposleno 120 radnica

U okviru poslovne zone u općini Živinice počela je da radi Fabrika za preradu ribe, u kojoj je zaposleno 120 radnica. Fabrika je prije nekoliko mjeseci počela probni rad, a uspješno završena prva faza rezultirala je zvaničnim otvaranjem. Međutim, da bi se u potpunosti zadovoljio kapacitet planiranih radnih mjesta, ovoj fabrici je neophodna dozvola za izvoz. Tim povodom direktor Fabrike za preradu ribe je inicirao sastanak sa općinskim načelnikom, koji je i održan prošle sedmice. Dogovoreno je da se zajedničkim zalaganjem, preko Federalnog ministarstva za poljoprivredu, dođe do dozvole za izvoz, a koja bi omogućila zapošljavanje još 200 žena, navodi se u općinskom saopćenju. Načelnik Samir Kamenjaković se zahvalio investitoru koji je prepoznao poslovni ambijent u Živinicama i što svojim ulaganjem doprinosi razvoju općine. Dodao je da ohrabruje činjenica što se javljaju novi investitori iz BiH i inostranstva koji su zainteresovani za ulaganje u Živinice.

D.K.



## BH sedmica inženjerstva okupila svjetske i bh stručnjake „Tuzla okupila tehničku pamet“

„Želimo da kroz Privrednu komoru stvorimo jednu bazu eksperata po svim inženjerskim oblastima“



„Ljudi su najznačajniji faktor razvoja, ljudski talent i ljudsko znanje i ovo je prilika da koristimo znanje naših ljudi u zemlji i inostranstvu da se umrežimo i ostvarimo sinergiju kada nam je potrebna više nego ikada“, kazao je u ime domaćina Grada Tuzle Jasmin Imamović otvarajući Prvu međunarodnu "Sedmicu inženjerstva u BiH". Zahvalio se na organizaciji konferencije i poručio poduzetnicima i profesorima da se umreže kako bi se što prije izvukli iz krize. U ime Vlade Tuzlanskog kantona, pokrovitelja BH Sedmice inženjerstva, Osman Puškar, ministar privrede izrazio je nadu da ovaj događaj bude početak nečega što okuplja svu pamet ovih prostora. "Ponosan sam što je Tuzla okupila tehničku pamet koja je uvijek bila nosilac razvoja", kazao je Puškar. Zlatko Berbić, direktor projekta, naglasio je da mladost mora imati podršku kako bismo im pokazali da svi zajedno možemo napraviti budućnost tako što ćemo se baviti industrijom 4.0, pametnim gradovima i novim tehnologijama. Sead Jahić, direktor Udruženja mašinskih inženjera i član Organizacionog odbora događaja, kazao su svi inženjeri prepoznali značaj događaja i da na marginama ovog događaja žele da ih udreže u jedno krovno udruženje. Ispred Udruženja poslodavaca skupu se obratio Mladen Pandurović koji je istakao je da bez tehnološke pameti i inženjera i sređivanja društvenih odnosa sigurno nećemo imati zadovoljavajući kvalitet života. "Mi smo čekali jedan ovakav događaj kako bismo objedinili sva udruženja inženjera jer želimo da kroz Privrednu komoru stvorimo jednu bazu eksperata po svim inženjerskim oblastima", kazao je Mirsad Jašarspahić, potpredsjednik PKFBiH i član Organizacionog odbora događaja. Dodao je da je konačan cilj imati ponudu eksperata inženjera njihovim članicama zbog kojih na koncu i posluju. Edhem Eddie Čustović, direktor Instituta inženjera elektrotehnike i elektronike IEEE kazao je da kompanije u BiH zaista imaju mnoga zanimljiva tehnička rješenja i proizvode koji su konkurentni na svjetskom tržištu, ali još bitnije i mnogo potencijala za rast.

"Ovom sedmicom povezujemo organizacije i predstavljamo inženjerstvo kao vrlo bitnu stvar u jačanju privrede u BiH, tu je plasiranje novih proizvoda i novih usluga na strano tržište a najvažnije približavanje profesionalnosti same

struke sa Evropskom unijom", istakao je Čustović, koji je i predsjednik organizacionog odbora BH Engineering Week-a.



Inače, u okviru BH Sedmice inženjerstva centralni događaj Business strategic forum okupio je aktore uključene u razvoj industrije, vlasnike kompanija, direktore, istaknute inženjere, tehnologe, eminentne profesore, inovatore. Drugim riječima, BSF okupio je stručnjake i sve one koji odlučuju o implementaciji projekata i rješenja koja izlaze iz inženjerskih i tehnoloških kompanija, kao i za one koji će uvidjeti korist istih i odlučiti uložiti novac u njihov razvoj i realizaciju. Digitalizacija 4.0, nove tehnologije, robotika, pametni gradovi, transport energije, te baze podataka su velika prilika za razvoj domaće industrije i veću konkurentnost ekonomije za bolji životni standard građana, samo su neke od tema o kojima se govorilo. Mnogobrojna inženjerska rješenja i inovacije razvijene u glavama i timovima domaćih inženjera i stručnjaka pomogle su BH kompanijama da ostanu konkurentne na stranim tržištima. Organizatori su poručili da je događaj značajan za cjelokupnu BiH i razvoj pozitivnog okruženja za sve građane BiH, a u cilju ostanka u Bosni i Hercegovini i poslovnog napretka iz Bosne i Hercegovine.

Akta.ba



## Privredna kretanja u Tuzlanskom kantonu I-IX 2018

U devet mjeseci 2018. godine došlo je do pada obima industrijske proizvodnje u odnosu na isti period 2017. za 1,7%. Prerađivačka industrija ostvaruje rast od 2,7%, dok vađenje ruda i kamena ima pad obima proizvodnje od 3,2%, a proizvodnja i snabdijevanje električnom energijom pad od 9%.



Industrijska proizvodnja I-IX 2018/ I-IX 2017 (%)

U devet mjeseci 2018. godine iz Tuzlanskog kantona ukupno je izvezeno proizvoda u vrijednosti od 1.285.563.000 KM što je u odnosu na isti period 2017. godine rast od 10,97%. U isto vrijeme je došlo do rasta uvoza od 11,69% te je uvezeno roba u vrijednosti od 1.467.924.000 KM. Pokrivenost uvoza izvozom je 87,58%, a vanjskotrgovinski deficit je 182.361.000 KM.

U odnosu na isti period 2017. godine, u devet mjeseci 2018. došlo je rasta izvoza industrijskih materijala 5,3%, goriva i maziva 34,1%, kapitalnih proizvoda 10,8% i proizvoda za široku potrošnju 14,9%, dok je došlo do pada izvoza hrane i pića za 22% i transportnih sredstava 1,6%.

Rast uvoza u odnosu na devet mjeseci 2017. godine ostvaren je kod industrijskih materijala 9,3%, goriva i maziva 25,7%, proizvoda za široku potrošnju 6,8%, kapitalnih proizvoda 3,8%, te hrane i pića 0,2%. U istom periodu došlo je do pada uvoza transportnih sredstava 0,1%.


Najznačajniji vanjskotrgovinski partneri Tuzlanskog kantona su Njemačka, Slovenija, Italija, Hrvatska i Austrija.



Prema podacima Porezne uprave FBiH, u septembru 2018. godine broj zaposlenih na području Tuzlanskog kantona je 100.005.

Na evidenciji JU Služba za zapošljavanje Tuzlanskog kantona, Tuzla na kraju septembra 2018. godine evidentirane su 80.167 nezaposlene osobe. Stručne osobe učestvuju sa 53.899 ili 67,23%, a nestručne sa 26.268 ili 32,77%. U ukupnom broju osoba koje traže zaposlenje su 47.366 žena. Broj osoba koje prvi put traže zaposlenje je 34.882 ili 43,5% u odnosu na ukupan broj nezaposlenih.

	Zaposleni	Nezaposleni
I 2018	97.876	84.450
II 2018	98.280	83.828
III 2018	98.735	82.537
IV 2018	98.774	81.479
V 2018	99.751	80.248
VI 2018	99.771	79.998
VII 2018	99.825	80.135
VIII 2018	98.859	80.666
IX 2018	100.005	80.167



Zaposleni i nezaposleni u 2018. godini



	Zaposlenost (IX 2018)	Nezaposlenost (IX 2018)	Prosječna plaća (KM) (IX 2018)
<b>UKUPNO</b>	<b>100.005</b>	<b>80.167</b>	<b>782</b>
Banovići	5.838	4.633	914
Čelić	1.207	2.398	680
Doboj-Istok	2.474	1.997	540
Gračanica	10.799	7.473	602
Gradačac	9.104	6.384	650
Kalesija	5.565	7.215	676
Kladanj	2.256	2.345	712
Lukavac	10.406	8.403	763
Sapna	746	2.121	809
Srebrenik	7.787	7.539	665
Teočak	716	1.344	780
Tuzla	31.320	16.868	902
Živinice	11.787	11.447	778


Zaposleni i nezaposleni u općinama TK

Prosječna neto plata u Tuzlanskom kantonu u septembru je iznosila 782,00 KM što je ispod prosjeka Federacije BiH. U odnosu na kantonalni prosjek iz 2017. godine, neto plaća je veća za 2%. Najviše prosječne neto plate u Tuzlanskom kantonu su u sektoru proizvodnje i opskrbe el.energijom, dok su najniže prosječne neto plate u građevinarstvu.

Djelatnost	Tuzlanski kanton	
	Neto plaća	Bruto plaća
A Poljoprivreda, šumarstvo i ribolov	693	1.038
B Vađenje ruda i kamena	977	1.491
C Prerađivačka industrija	603	905
D Proizvodnja i snabdijevanje el.en., plinom	1.533	2.387
E Snabdijevanje vodom i uklanjanje otpadnih voda	881	1.341
F Građevinarstvo	501	747
G Trgovina na veliko i malo	530	797
H Prevoz, skladištenje i komunikacije	688	1.039
I Hotelijerstvo i ugostiteljstvo	542	816
J Informacije i komunikacije	1.065	1.653
K Finansijske djelatnosti	1.219	1.898
L Poslovanje nekretninama	562	857
M Stručne, naučne i tehničke djelatnosti	934	1.442
N Administrativne i pomoćne uslužne djelatnosti	559	845
O Javna uprava i odbrana	1.166	1.799
P Obrazovanje	828	1.273
Q Zdravstvena socijalna zaštita	1.153	1.794
R Umjetnost, zabava i rekreacija	637	969
S Ostale uslužne djelatnosti	871	1.326



THE CHAMBER OF ECONOMY OF TUZLA CANTON



# TUZLA CANTON

Your Business Partner

